

Statutas

Egualitad da schlatteina

Las denominaziuns da personas valan per omisduas schlatteinas.

I. Finamira e domicil

- Art. 01 L'«Uniun Rumantscha Rezia Bassa» ha la finamira da mantener e cultivar il lungatg e la cultura romontscha, specialmein il cant romontsch tradiziunal.
El reunescha ils Romontschs dalla Svizra Orientala e promova tut quei che survescha allas tendenzas ella Romontschia ed ella Bassa, en emprema lingia denton egl intschess dalla Svizra Orientala.
En special vul el approfondar l'enconuschientscha dil lungatg e la cultura romontscha da ses commembers, sustener las lavurs dalla Ligia Romontscha e d'autras uniuns cun la medema finamira sco era luvrar en favur dil romontsch en in ambient tudestg.
- Art. 02 Ell'Uniun Rumantscha Rezia Bassa gaudan tut ils idioms romontschs ils medems dretgs ed eguala consideraziun.
- Art. 03 En damondas politicas e confessionalas ei l'Uniun Rumantscha Rezia Bassa absolutamein neutrala.
- Art. 04 Siu liug da domicil ei Sargans, siu intschess ei la Svizra Orientala.

II. Commembers e lur responsabladad finanziaria

- Art. 05 Mintga Romontsch ed amitg dil romontsch sa daventar commember. Ils commembers stattan en negin grau garant cun lur facultad privata. L'Uniun Rumantscha Rezia Bassa stat sulettamein garant cun sia facultad da fatschenta.
- Art. 06 Arisguard entradas ed extradas, recepziun ed exclusiun da commembers valan ils artechels respectivs dil Cudisch civil svizzer.

III. Organs

- Art. 07 Ils organs dall'Uniun Rumantscha Rezia Bassa ein:
- la radunonza dils commembers (radunonza generala)
- la suprastonza
- ils revisurs da quen

A. La radunonza generala

- Art. 08 La radunonza generala ordinaria vegn convocada dalla suprastonza igl empram quartal digl onn. La suprastonza ni in tschunavel dils commembers sa proponer ina radunonza extraordinaria. La radunonza generala vegn convocada entras in'invitaziun persunala als commembers.
- Art. 09 La radunonza generala elegia il parsura, quatter auters commembers dalla suprastonza e dus revisurs da quen e deliberescha las tractandas presentadas ad ella dalla suprastonza. Tractandas d'impurtonza secundara san vegnir deliberadas senza vegnir avisadas ordavon. Davart la deliberaziun definitiva d'ina tractanda buca previda decida la radunonza generala.
- Art. 10 Ina ga ad onn organisescha l'Uniun Rumantscha Rezia Bassa ina sera romontscha. La suprastonza ed eventualmein subcumissiuns fan las preparativas necessarias.

B. La suprastonza

- Art. 11 La suprastonza secumpona da tschun commembers (president, actuar, cassier e 2 consuprastants) e constituescha sesezza. Las personas eligidas duein, sche pusseivel, derivar ord igl intschess da differents idioms. Ina perioda d'uffeci cuoza treis onns e finescha definitivamein suenter quater elecziuns.
- Art. 12 La suprastonza representa l'Uniun Rumantscha Rezia Bassa, diregia sias fatschentas, prepara las tractandas per la radunonza generala e proveda tut quei che survescha a siu scopo.

Ella ei cumpetenta d'adossar incumbensas specialas a singuls commembers ed a cumissiuns eligidas dad ella.

C. Ils revisurs da quen

Art. 13 Ils revisurs da quen examineschan il quen annual sco era l'administraziun dallas finanzas e rapportan surlunder a caschun dalla radunonza generala.

D. Cumissiuns specialas

Art. 14 Las subcumissiuns specialas exequeschan las incumbensas surdadas ad ellas dalla suprastonza:

- dirigient dil Chor mixt romontsch
- pagina d'internet
- preparaziuns per fiastas
- relaziuns cun las medias
- e.a.v.

IV. Finanzas

Art. 15 Ils mieds finansials derivan:

- dallas contribuziuns annualas dils commembers
- da legats e contribuziuns voluntaras
- d'entradas d'arranschaments specials (Chor mixt romontsch)

La contribuziun annuala dils commembers vegn fixada mintg'onn dalla radunonza generala. Giuvenils tochen 20 onns pagan negina contribuziun, ils ulteriurs commembers pagan senza excepziun l'entira contribuziun annuala.

Art. 16 Igl onn da gestiun cuoza mintgamai tochen ils 31 da december.

Art. 17 La suprastonza ei cumpetenta da decretar expensas da tochen 3'000 frs. ad onn.

V. Commembers d'honor

Art. 18 Commembers che han prestau fetg buna lavur per l'Uniun Rumantscha Rezia Bassa duront 20 onns sa la radunonza generala eleger sco commembers d'honor.

VI. Revisiun dallas statutas

Art. 19 Dus tiarzs dils commembers presents san decider davart ina revisiun dallas statutas.

VII. Sligiazion dall'Uniun Rumantscha Rezia Bassa

Art. 20 Per sligiar l'Uniun Rumantscha Rezia Bassa ei il consentiment da dus tiarzs da tut ils commembers necessaris.

Art. 21 In'eventuala facultad vegn surdada alla Ligia Romontscha a Cuera cun la cundiziun da surschar quella ad in'eventuala nova instituziun romontscha ella Svizra Orientala cun finamiras semeglientas. Sch'ina tala vegn buca fundada enteifer 5 onns, daventa la facultad proprietad dalla Ligia Romontscha.

VIII. Disposiziun finala

Art. 22 Las statutas dall'Uniun Romontscha District Sargans e contuorn dils 30 d'avrel 1966 ein vegnidas revedidas risguardond l'extensiun digl intschesch e la midada dil num en «Uniun Rumantscha Rezia Bassa» ed approbadas a caschun dalla radunonza generala dils 18 da mars 2018. Ellas van en vigur cun la radunonza generala 2018. Revisiun digl artechel 16 a caschun dalla radunonza generala dils 15-08-2020. Revisiun digls artechels 09 ed 11 a caschun dalla radunonza generala dils 28-08-2021.

Jenins, ils 28-08-2021

Per la suprastonza dall'Uniun Rumantscha Rezia Bassa:

il parsura: Rinaldo Caduff

l'actuara : Lea Killias